

Regional News Unit AIR Aizawl
Friday, February 07, 2025
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Mizoram leh Assam state inkara a tul anga thawhho dan tur leh inhriatthiam tawna tha zawk neih theih nan state pahnih aiawh te an inbia.
- Indo-Bangladesh joint boundary inspection team-ten India leh Bangladesh ramri chhinchhiahna phun tur leh ramria hna thawh an enfiah mek.
- Prime Minister Narendra Modia chuan sawrkarin hmasawna a kalpui dan model chu ram leh hnam a hmasa bera dah a ni a ti.
- Sawrkar laipui chuan Kum 2014 atangin Nuclear Power Plant 12 dinna tur a pawm tawh thu leh sum pekchhuah phalna pawh pek tawh a ni a ti.

<><><>

CACHAR-KOLASIB TALKS

Mizoram leh Assam state inkara a tul anga thawhho dan tur leh inhriatthiam tawna tha zawk neih theihna atana pawimawh thil chi hrang hrang nimin khan state pahnih aiawh ten an sawiho a.

Cachar DC Conference Hall ah Mizoram aiawhin Kolasib DC, Pu Robert C Lalmangaiha leh Kolasib SP Pu David H Lalthangliana te an kal a, Assam aiawhin Cachar DC, Pu Mindal Yadav leh SP Pu N Mahato te an tel a ni.

He hunah hian Kolasib DC chuan Mizoram ina VC inthlan an hmachhawn turah ramri leh a chhehvel ah dan leh thupek kenkawnah lamah a tul anga thawhpui turin a sawm a. Inunauna tha zawk a awm theih nan Kumin Chapchar kut lo thleng turah pawh Kolasib a hmanpui turin a sawm nghal a ni.

Heng bakah hian NHIDCL hmalakna a 4 lane kawngpui laih tur chungchang sawihovin Kolasib ah meeting neih nise anti a, state pahnih ramri hnaih a cheng ten harsatna an tawh loh nan leh thlamuang taka an awm theih nan Minister level a inbiakna a joint resolution anlo siam tawh chu vawng zel chungin a tul anga thawh dun zel nise anti bawk. He hunah hian Pu David H Lalthangliana, Kolasib SP pawhin Cachar SP leh a hoten Mizoram Police te kawng hrang hranga an thawhpui ah lawmthu a sawi a, hun lokal lehzel ah pawh thawhdunpui turin a sawm nghal bawk a ni.

He hun hi nikum August ni 9-a State pahnih Home Minister ten Assam leh Mizoram ramri ah inpawhna leh thawhhona tha zawk a awm theih nan, DC leh SP level ah inbiakna neih thin ni rawhse tia an thu dah bawhzuina a ni.

<><><>

VC/LC ELECTION

Karleh nilaini-a Village Council leh leh Local Council inthlan vote thlak anih tawh avangin, political party ten theihtawp chhuahin vote an zawng zui zel a, campaign pawhin a vawrtawp a thleng chho tan.

He inthlan neih turah hian, Party hrang hranga Village Council Election a candidate zawng zawng zat hi 6830 an ni a. General seat ah 5258, reserve seat ah 1674 a vaiin 6932 a ni a, candidate inhnukdawk 102 an awm a ni.

Local council Lunglei Municipal Council leh Aizawl Municipal Corporation ah hian candidate 2076 an awm a ni.

Local Council Aizawl Municipal Corporation ah candidate 1659 awmin, general 1211 leh reserve 448 an awm a. Local council Lunglei Municipal Council ah candidate 417 awmin, general 309 leh reserve seat ah 108 an awm bawk a ni.

ZPM Election Committee Chairman leh ZPM General Hqs Vice President Pu VL Zaithanzama, chuan ZPM candidate general leh reserve seat ah 2371 an neih thu a sawi a. Vawiin thlengin an party ZPM ah chuh lohva tlinga puan candidate 29 awmin, heng 29 zingah hian general 17 leh reserve 12 an awm a ni.

Heng bakah hian party dang chuhlohva tlinga puan an awm bawk a, MNF atangin candidate 5, INC atangin candidate 4 leh independent candidate atangin 2 an awm a, chuhtu awm lova tlinga puan zat hi an vaiin 40 an ni.



MIZORAM STATE UNIVERSITY BILL

Higher & Technical Education Department Secy Pu H. Lalengmawia chuan Mizoram State University dinna tur bill buaipui mek a ni a, tun Budget session-ah hian sawiho tura pharh hman tum a ni a ti.

Nimina Pachhunga University College Mizo Department-in ‘Thangliana Kutchhuak leh Sulhnu Zir Chianna’ an buatsaih a hmanpuinaah he thu hi sawiin, Pu H. Lalengmawia chuan, NEP 2020 ah kum 2035 hnu lamah Affiliated College awm phal a nih dawn tawh loh avangin, tuna Mizoram University hnuiaia college te an awm ang hian an awm thei tawh dawn lo tih a sawi a. “State sorkar chuan sum harsa chung chung pawhin state university din turin ruahmanna a siam mek a, a bill pawh peih a ni tawh a ni,” a ti a. State university hi a hautak lo thei ang berin, Clustered University-a din tum a nih thu a sawi a. College leh institution hrang hrang te chu hman tangkai tum a nih thu a sawi bawk.

Pu H. Lalengmawia chuan kum 2019-a Prime Minister-in a thua a hawn tawh, Mizoram Engineering College pawh central-in a rawn nawr nasat tawh avangin, kum 2026 session-ah chuan, subject pali velah a taka class tan hman tum a nih thu a sawi bawk.



NYK

Nehru Yuva Kendra Sangathan (NYKS) hnuiaia Meghalaya leh Mizoram state thalaite intlauh tawna, inter-state youth exchange programme chu Lunglei Zotlanga Tourist Lodge Conference Hall-ah nimin khan hawn a ni a,

Meghalaya-Mizoram youth exchange programme hi Deputy Inspector General of Police (Southern Range) Pu Altaf Ahmad Khan chuan a hawng a.

Ṭhalaite chu ram hmasawna kawnga a lailum luahtu leh hmanraw pawimawh ber an nih thu sawiin, ṭhalaite theihna leh thiamna ramin a hman ṭangkai thiam danah ram hmasawna chu thui tak a innghat tih a sawi a. Ṭhalaite'n rilru put hmang dik an neih theih nana NYK hma lakna chu fakawm a tih thu sawiin, ṭhalai kal khawmte chu YEP kal tlanga thil thar zir chhuah tum tur te, ruihhlo laka inthiar fihlim tur leh mi dangte ṭanpui leh zirtirtu ni zel tur te'n a fuih a ni.

He hun hi NYK Mizoram State Director Pi Mercy Sellate chuan kaihruaiin, Meghalaya-Mizoram YEP-ah hian Meghalaya aṭangin Team Leader pahnih hovin ṭhalai 25 an kal a. NYK Lunglei chu a thlengtu niin, ni 10 thleng hun a ni dawn a ni.

Hemi chhung hian Meghalaya aṭanga ṭhalai lo kalte hi Mizoram leh Mizote chanchin, nunphung, hnam ziarang leh thil pawimawh hrang hrang zirpui an nih bakah, Lunglei leh a chhehvela pisa leh hmun pawimawhte fanpui an ni dawn a. Mizo inmikhuah dan leh Mizo ei leh in te an hriat thiam theih nan YMA Zotlang Branch te'n lo mikhuahlin hun an hmanpui dawn a. Hnatlang bakah, Mizo ṭawng, hla leh lam zir hona te buatsaih ṭhin a ni bawk ang.

Tun thla vek, ni 17 – 21 chhungin Mizoram aṭanga ṭhalai thlan chhuahte'n Meghalaya tlawh ve thungin, inter-state YEP hun hi hman chhonzawm a ni ang.

<><><>

INDO-BANGLA BORDER JT INSPECTION TEAM

India leh Bangladesh ramri chhinchhiahna phun tur leh ramria hna thawh a hmuna enfiaktu, India leh Bangladesh aiawhte telna, Indo-Bangladesh joint boundary inspection team-te chu nimin khan Lunglei District Bawrhsap Pi Navneet Mann chuan Lunglei Circuit House-ah chawchhun eipuiin, inkawm hona buatsaih a ni.

India leh Bangladesh inkara Director-SG Level Joint Boundary Inspection hi February ni 4 - 10 chhunga kalpui tura ruahman niin, Joint Inspection Team-ah hian India leh Mizoram ai awh mi paruk leh Bangladesh ai awh mi pasarih an tel a. India team hi Survey of India hnuaiia West Bengal & Sikkim Geo-spatial Directorate-a Director Pu Uday Shanker Prasad chuan hovin, Bangladesh lam hi Surveyor General of Bangladesh Brigadier General Nur-E-Alam Mohammad Jobayer Sarwar chuan a ho a ni.

Lunglei Bawrhsap Pi Navneet Mann chuan Joint inspection neih mek chuan India leh Bangladesh inkarah inrin tawna leh inpawhna ṭha zawk a thlen ngei a beisei thu sawiin, Bangladesh palaite chu India-a an awm chhungin hun nuam tak hmang turin duhsakna a hlan a ni.

He joint boundary inspection hi November ni 12 - 14, 2024-a Kolkata-a 45th Joint Boundary Conference thu rel bawh zuina a ni a. Ramria hna thawh mek endikna joint boundary inspection hi kum tin kalpui tura ruahman a nih laiin, COVID-19 hri leng avangin kum 2019-2020 aṭang khan inspection hi chhonzawm theih a ni ta lo va. Tun ṭum hi Covid hnuah joint inspection kalpui leh hmasak ber a ni.

Tun ṭuma joint inspection-ah hian February ni 4 - 7 chhungin India ram chhungah endikna kalpui tur niin, February ni 7 - 10 chhungin Bangladesh ram chhung lamah endikna hi kalpui chhonzawm a ni ang.

<><><>

CM-NH FOUR LANE

Chief Minister Pu Lalduhoma'n Vairengte leh Aizawl inkar kawng four lane laih meka, zangnadawmna lama harsatna avanga hna chawlsan tawh chu Sawrkar laipuiin zangnadawmna pek a remtih avangin package 5 leh 7 chu thla hmasa atanga khan chhonzawm leh a ni a ti.

Chief Minister chuan a Instagram account kaltlangin he thu hi sawiin Vairengte – Aizawl Four lane laih meka, zangnadawmna lama harsatna avanga hna chawlsan tawh chu a thawktute pawhin inhnuhdawh san mai an duh tawh a ti a, Nikum October thlaa Highway Review Meeting-a an dil angin Sawrkar laipui chuan zangnadawmna chu pek a remti tih sawiin thla hmasa atangin package 5 leh 7 ah hmalak chhonzawm ani tawh tih a sawi.

Chief Minister hian nikum October ni 26-a CMO Conference Hall-a Press Conference a neihna ah Vairengte leh Sairang inkar kawngpui thlur lia laihna tura ram neitute hnena zangnadawmna pek tur tihfel ani tawh a ti a, Chief Minister sawi danin rei tak forest clearance felloh avanga thawh theihloh chu Road Transport & Highways Minister Nitin Gadkari hnenah a ngenna angin chinfel dan an ngaihtuah a ti a, Forest Department leh ram neitute tan na chu a dik ve ve avangin an pahnihna zangnadawmna pe turin a ngen tih sawiin an pahnihin an hmu ve ve thei dawn a, Forest department in cheng vbch 90 leh ram neitute tan cheng vbch 1100 vel dah ani tih a sawi.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



PM

Prime Minister Narendra Modia chuan sawrkarin hmasawmna a kalpui dan model chu ram leh hnam a hmasa bera dah a ni a ti. Rajya Sabha-a President thusawi chungchanga lawmthu sawina motion sawihonaah he thu hi sawiin Pu Modia chuan mipuiten he hmasawmna model an kalpui hi an enchhin a, an hre thiam tawh baw k a, an thlawp zui a ni a ti a. Hei vang hian a sawrkar chuan a zawna a term thum nan thuneihna an pe ta a ni a ti baw k.

OBC)

PM Modia chuan sawrkarin ST leh SC te venhimna dan ti chak turin hma a lak thu a sawi a. Hei bakah hian hnam hnuaihngung zawkte hamthatna tur a ngai pawimawh hle tih sawiin mahni nihna inthlak transgender te dan anga humhimna pawh an sawrkar chuan tha takin an nei a ti a. OBC ten hun rei tak an lo phut tawh ram danpui hnuaiia OBC Commission kalpui pawh tihhlawhtlin a ni tawh a ti baw k.

Prime Minister Modia thusawi zawh hian President Draupadi Murmu-I thusawi chungchanga lawmthu sawina motion chu Rajya Sabha ah hian pawm zui nghal a ni.



NUCLEAR

Sawrkar laipui chuan Kum 2014 atangin Nuclear Power Plant 12 dinna tur a pawm tawh thu leh sum pekchhuah phalna pawh pek tawh a ni a ti. Rajya Sabha-a ziaka zawhna chhangin Union Minister for Personnel, Public Grievances and Pensions leh PMO Dr.Jitendra Singh chuan tualchhunga siam 700 MW Pressurized Heavy Water Reactors 10 din turin hmalak mek anih thu sawiin Russian Federation nen thawkdunin Kudankulam-ah Light Water Reactors pahnih din turin hma lak mek a ni a ti bawk.

<><><>

TOURISM MINISTER

Union Tourism Minister Gajendra Singh Shekhawat chuan Special Assistance for Tourism hnuiaia state ten project an kalpuite chuan hna thar tam tak a siam dawn a ti. Rajya Sabha-a zawhna chhangin Pu Shekhawat-a chuan khawi hmunah pawh ni se Tourism lama hmasawna chuan hna thar siam kawngah hmasawna a thlen thin a ti a. Union Minister chuan state ten project ruahmanna an siamte chu pawmpui tura ngaihtuah thuai a ni ang a ti bawk.

<><><>